

ram illi Tuam praestabis, non fieri non potest, quin et Tuae doctrinae opes eadem haec opera sit locupletatura, utque tot praeclaros codices Biblioth. Reg. Madrit. quorum Iriarte V. C. gustum dedit, sis excussurus. Ad quod iter ingrediendum cum nunc sis accinctus et tantum non in ipso discessu constitutus, faciamus id, quod amici et familiares in discidio et disunctione longinquae profectiois facere solent, ut nouissima confabulatione de communibus rebus ac curis paullo diutius se detineant et hanc ultimi sui congressus dulcem recordationem secum auferant.

Video Te constituisse studium Tuum et operam Quinto, quem, cum tanta eius utilitas ad Homerum ornandum esse posset, tamdiu neglectum iacere, saepe conquesti sumus; cum interea virorum doctorum ingenia exercerentur interdum in scriptoribus longe inferioris ordinis. Quid tamen conquerimur de Quinti sorte, cum Homeri fortuna multo magis deploranda sit. Si quis erat scriptor, in quo diligentius tractando et, quam maxime fieri posset, seu ad criticam regulam exigendo seu liberali interpretatione illustrando, ingenia recentiorum desudare deberent, erat Homerus, omnium litterarum a Graecis ad nos deductarum fons et auctor, antiquitatis, philosophiae, religionum antiquarum promus condus; in cuius interpretatione recte instituta omnis bona litterarum sacrarum interpretatio praesidia habet certissima; quam parum ta-